

## CUI NUS LIBERARÀIAL DES LIBERAZIONS?

Un brut vizi al à simpri vût il lengaç dai nazionaliscj di ogni paîs e di chei talians prin di ducj: il vizi di robâ peraulis ae liturgie religjose par invuluçâ dentri di lôr la mercanzie pulitiche. Redenzion, Riscat, Risurrezion, Martueri, Batisim di sanc, Fede, Olocaust, Liberazion, Valôrs Spirituâi e vie indenant, a son peraulonis gruessis e scuasi simpri falsis, co si trate di fats che a àn la lôr misare lidrîs e la lôr spiegazion tes ambizions dinastichis, tes infatuazions, tai calcai dai mistirants di pulitiche o te disperazion di cui che si è masse esponût cuintri i parons.

Par chel dute la leterature taliane dal "Risorgjiment" e finîs cul fâ nausie ancje a cui ch'al à il stomi di lamarin. O podaressin acetâ cheste storie di vuerutis mâl comandadis, di insurrezions mal preparadis e ladis simpri strucjis, di trucs diplomatics, se nus vignîs presentade cu la sô vere muse, cu lis sôs mutivazions economichis, sociâls o sintimentâls, tes sôs veris misuris, cui siei fai e cui siei risultâts, come un zûc di interès, di bramis, di contrascj, di fanatisims: come che si presente la storie di cualunche altre nazion. Ma no: ogni pas di teren ocupât al è "liberât"; ogni barufe cuintri la polizie e je un "eroisim"; ogni impresute armade une "epopee"; ogni cjâf scjaldât un "apuestul"; ogni disgraciât capitât tes sgrifis de magjistradure un "martar"...

Cheste nomencladure e je aromai consacrade de tradizion retoriche, e Di' uardi a bandonâle par doprânt un'altre plui sclete: al sarès un tradiment, une blesteme. Cussì no son plui lis ideis che a crein lis peraulis, ma lis peraulis che a àn il compit di creâ lis ideis.

Ma il timp des mitologjiis al varès di jessi finît. Vino di dâ une cjalade ae nestre storie, ae storie dal Friûl? A son capitâts i prins abitants - euganis? venits? - poben, e je une robe tant lontane: *insediament*. A son vignûts i Carnics: *invasion*. Parcè? I romans ju àn fruçâts: *liberazion*. Cemût? A rivin i Langobarts: ancjemò *invasion*. Po i francons: *concuiste*. Mancul mâl! Dopo, i patriarcjis: *apostolât* o *ricostruzion*? Mah! Po dopo, Vignesie; eh, *liberazion*, dal sigûr. Po' dopo Napoleon: altre *liberazion*!. Cjampfuarmit: *tradiment*, *mercimoni*! Po l'Austrie: *sclavitût*. Il Corantevot, une scalmane che nissun capive dulà che al veve di rivâ: *epopee*. Il Sessantesîs, un regâl de Prussie a l'Italie: *redenzion*! Il nufcent e disevot: il Friûl Orientâl al à batût - gjavant cuatri di lôr - cu l'Austrie cuintri i talians: altre *redenzion*. L'ultime vuere: une babilonie che no si sa di ce bande cjavâle, finide cuntune roseade sui cunfins: il *brigantesco diktat*. Etc.

In paraulis puaris: il solit brut distin di une regjon di cunfin tra diviarsis nazions dutis armadis di gramulis; la disdete di une situazion gjeografiche danade: come la Alsazie, come la Polonie, come la Transilvanie... nuialtri. Chê e je la realtât di îr e di vuê.

Triest si è svilupât, dopleât, al è diventât une citadone grande, siore, plene di vite sot da l'Austrie, sot di un ordenament

ch'al jere une vore miôr di ducj i guviars talians dai ultins doi secui. Ma al jere un guviar forest... Poben, fasìnle buine cheste reson e fasìn buine la brame dai iredentiscj di vê un guviar no forest; ma un guviar almancul tant sapient di chel di prime, e no une baraonde di burocraziis, di camoris, di cjastronadis, di prepotencis, di tassis e di inerzie comerciâl come chê che i à puartât la "*liberazion*". Liberazion di ce? Dai pulizais crauats? Cui ju viodeve? Des forcjis? In cincuant'agns a'ndi jere stade implantade une sole: chê di Oberdan, che al veve fat di dut par che lu picjassin, persuadût che il so cadavar al sarès stât la bombe atomiche dal imperi di 'Sef dal Gjes.

E cussì, pôc sù pôc jù, il Friûl fintremai al '66 o fin al '18. Noaltris no vain l'Austrie, dal sigûr; ma o vain l'insipiente dai liberadôrs che nus àn fat stâ une vore piês di prime.

E cumò nus capite une liberazion ad an: il '18 nus à finît di liberâ dai mucs; la Marce di Rome nus à liberât dai soversîfs; il 25 di lui nus à liberât di Mussolini; i aleâts nus àn liberât dai naziscj e dai republichins; il 2 di jugn nus à liberât de monarchie; i comuniscj a àn di liberânus dal Pape e dai aleâts... Crôs di Diu, e cui nus liberaràial des liberazions?

(Patrie dal Friûl - 1948)